


21720/B



Digitized by the Internet Archive
in 2018 with funding from
Wellcome Library

<https://archive.org/details/b30520186>



FRANC. JOS. ENGELHART,

AUSTRIACI BERCHTOLDSDORFENSIS

DISSERTATIO

INAUGURALIS MEDICA

SISTENS

EFFECTUS AQUÆ COMMUNIS.



VINDOBONÆ,

TYPIS JOAN. THOM. NOB. DE TRATTNERN,

CÆS. REG. AULÆ TYPOGR. ET BIBLIOP.

1776.

THE UNIVERSITY OF CHICAGO

LIBRARY


OFFICE OF THE

PROFESSOR OF

PHYSIOLOGY






 Cum mihi sit animus unice vires, & effectus aquæ communis exponere, quantum pertinet ad usum diæteticum, medicumque; verba de criteriis aquarum non faciam, atque brevissime tantum ea, quæ in Physiologia tractantur, de puritate diversarum aquarum maxime occurrentium revocabo in memoriam, ut simul appareat esse inter has differentiam, quoad effectus, & salubritatem: atque mox dicam de aqua communiter *frigida* dicta, tum de *gelida*, ultimo de *calida*.

Aqua liquor ille valde fluidus, pellucidus, inodorus, insipidus, humectans 32. ther. Farhenh. frigoris gradu congelascens, caloris gradu 21 2. ther. Farhenh. ebulliens, in vapores resolubilis, adæquatum salinum menstruum.



Est fluvialis, fontana, putealis, nivalis, pluvialis, cystemalis, lacustris, paludosa.

Fluvialis exercitata debito cursu per arenosa, lapidosaque loca, adeoque fere filtrata, dum fordes arenulis, & lapidibus adhærent, purior est.

Purior quoque est *fontana*, e rupibus, montibusque saxosis, aut arenosis scaturiens, & per similia loca decurrens: quamquam, & fluvialis, & fontana piscibus, insectis, & mineralibus plus minus in diversis regionibus inquinatæ sint. Verumtamen, quo rapidiori motu feruntur, eo puriores sunt.

Putealis denuo bona est, si sæpe hauriatur, ne quiete nimia corrumpatur, si bene tecti sint putei, atque mundi, & simul, quid quid in illis tuborum est, sollicitè repurgetur. Differt tamen, sicut priores pro natura soli subterranei.

Pluvialis quidem levior est prioribus, non tamen melior, aut purior. Excepta vitro licet puro format nubeculam, deinde sedimentum viride, & cito putredine corrumpitur. Est enim sicut lixivium aëris, in quo continentur innumerabilia insecta, horumque ovula, ac omnis generis exhalationes, animalium, vegetabilium, mineralium. Sed quo frigidius est cœlum, eo purior est.

Nivalis, quia frigore, & gelu constricta telluris superficie, minus abundant exhalationes,



nes, multaque in aëre pereunt infecta eorumque ovula, ceteris purior censetur, & licet nondum purissima sit, tamen propius ad naturam destillatarum accedit.

Hac longe impurior est *glacialis*, quæ etsi viva non habeat infecta, tamen iis corruptis, & aliis omnibus particulis inquinata est.

Cysternalis, etsi ipsæ cystemæ diligenter repurgentur, stagnando nullomodo renovata, cito corrumpitur, foetida fit, & non raro venenatas dotes acquirit.

Omniū deterrima est *paludosa*, quia stagnat, & ideo corrupta maxime propter immensum numerum insectorum in ea viventium, putrescentiumque. Etiam herbæ, & varia vegetabilia putrescentia magis eam inficiunt; hinc tam sæpe pestifera est.

Dum autem adeo impuræ sunt aquæ; si necessitas reddat earum usum inevitabilem, corrigi debent eo modo, quem indicat BOERHAAVIUS in Institut. Physiol. colando per arenas, per manicam Hippocratis, coquendo, quiete, ut deponant sedimentum; adjectione aceti, vini, spiritus Vitrioli, Nitri, Sulphuris per campanam, &c.

Aqua temperate frigida, vel communiter, aut frigidula vulgo dicta, posset talis esse respectu corporis nostri plus minus calentis; sed in genere sic appellari solet ea, quæ, cum



ab homine sano non æstuante corpore hauritur, amœnum frigoris sensum excitat, qualis est aquæ fluminum, & rivorum temperato cælo, atque puteorum in æstivis caloribus. Hæc ab omni ævo mortalibus potum saluberrimum omnium suppeditavit. Etenim ipsam sitim optime restinguit, nec ullo stimulo vires cordis, aut arteriarum irritat; diluit crassitiem humorum, & debitam illis fluiditatem conciliat, unde maxime pendet facilitas, & constantia secretionum, excretionumque. Ipsa est unicum vehiculum nostrorum humorum; est autem in tam parvas particulas divisibilis, ut facile permeet omnia vascula minima, quæ hodie cognita sunt; ipsa per se insensibilis perspiratio Santoriana, quid aliud est, quam aqua salibus, & oleis paucis inquinata? quid aliud urina, & saliva? Ubi deficit in nostris humoribus debita aquæ copia, illico turbantur secretiones, oriuntur obstructions. Præterea impedit degenerationem humorum, & salia temperat eluitque, ac ea omnia, quæ per vitæ vires constanter abrafa degenerando sanguinis naturam vitiarent.


Quantum adjuvet digestionem solidorum ingestorum, patet cuique consideranti. Nam ut ingeritur frigidiuscula, ventriculum roborat, moxque cum incipit intepescere, penetrat ingesta, dividit, & solvit, quod solubile est, ut facilius idem extricetur, eliciaturque; mu-

cum

cum ventriculi diluit, efficitque, ut ille dividat oleosa, omniaque commisceantur, & totum liquamen jam induat colorem gryseum, quod dicitur Chymus. Nec officit, quod multi loco aquæ vinum, cerevisiam ingerant, horum enim vehiculum est abundantissima aqua: quod, nisi ita esset, certe brevi læderetur digestio, brevique deficerent humores gastrici, pancreatici ex penuria liquidi aquosi in sanguine.

Videmus generatim ipsos abstemios vini, cerevisiæque plus comedere, citius digerere, longe voraciores esse: neque vero tanta incommoda percipiunt a refectione paulo largiore, quam vini potatores; non fiunt perinde somnolenti, non sic venæ turgent, non calor urit, neque tam sæpe alvo obstructa laborant, neque sanguis eorum tanta acrimonia inquinatus esse solet.

Quin omnibus scientiæ medicæ peritis notissimum est nullum potum præter aquam esse magis accommodum iis, qui sese sustentant facile acescentibus, ut sunt farinosæ, multæque herbæ, & omnes pene fructus horræi. Vinum enim, & Cerevisia, qui sunt liquores fermentati, denuo fermentant: & ut fermentum massæ farinacæ adjectum excitat citius fermentationem acidam, sic hæc talibus in ventriculo admixta turbant digestionem, & generant acidum. Ingesta enim talia sua sponte



jam loco calido, humido, aëre præfente, incipiunt fermentare, si adhuc liquores fermentati superingerantur, æquo magis intenditur ille motus intestinus, & priusquam contenta ex ventriculo potuerint expelli, jam indolem acidam induunt, unde ructus acidi sæpe urentes læsam digestionem indicantes.

Ne quis tamen credat, aquæ simplicis vires vini viribus sine ulla exceptione anteponendas esse; dum enim adest in toto corpore languor, maxime a defectu liquidi nervei, imo ab inertia solidorum, conveniunt cardiaca, nervea, & stimulantia, quale vinum est. Sed nunc agitur, quis potus commodius in usum communem, & continuum recipi possit: non igitur hic sermo est de statu præternaturali, quamquam & aqua possit in statu morbofo feliciter adhiberi, ut postea patebit. Sed quæ tandem sunt illæ aquæ communis vires in junioribus elucens effectum quotidiano? Nonne illi celeriter crescunt? nonne multum appetunt, & bene digerunt? nonne aqua potatim minus acido laborant, quam qui ex perversa parentum opinione utuntur sæpe vino diluto, aut cerevisia.

Præmissis illis, quæ pertinent ad potum cibarium, nunc proponendum est, quemadmodum aqua temperate frigida possit in morbis exhiberi tanquam medicamentum.

Duplex autem ejus usus est *internus*, & *externus*; de interno prius dicam. At-

Atque jam antiquissimis temporibus celebrata fuit utilis, & ipse HIPPOCRATES (a) in febribus biliosis frigidam, quantum ægri vel-
lent, concessit: sitim utique fallit, temperat
fervorem, & acrimoniam humorum, atque
secretionem urinæ promovet. Verumtamen,
etsi hæc vera sint, non generalia sunt, quin
potius cautissimo judicio utendum est. Nec
vero HIPPOCRATES adhibuit frigidam sine
discrimine dictis in morbis, sed multa circum-
spiciebat, nec dabat, cum illæ febres neque
noctu, neque interdiu remitterent, neque cum
esset lingua sicca, aspera, neque cum supremæ
partes calerent, venter autem, & pedes frigi-
di essent.

Notari enim illud debet, aquam ratione
corporis sani frigidulam, longe frigidiorē
esse respectu corporis acuta febre decumben-
tis, corpus inde inhorreere, concuti totum,
constringi totam ejus superficiem, con-
stringi quoque vascula minora, humores re-
pelli in majora vasa, transpirationem Santo-
rianam illico minui, aut penitus cohiberi,
inde facile augeri, aut creari obstructions,
& diathesin inflammatoriam generari posse, at-
que millena ab eadem causa pendentia. Et
quamvis exhiberi possit cum aliqua modera-
tione, ut non tam subitaneo frigore constri-
ngat corpus, nimium tamen refrigerat, & tunc

(a) de Morb. L. 3. C. ult.



sanguis densatur, & immeabilis redditur; cum e contra in febribus acutis plerisque, ac præfertim quamdiu sunt in cruditate, emollientia, tepida, saponacea &c. indicantur. Hinc fit, ut optimus quisque medicus hodie abstineat a frigida in dictis casibus, aliaque propinet rationi magis congrua, a quibus nihil metuendum est. Nec ego moveor, quod plerique clament ab HIPPOCRATE, aliisque veteribus fuisse frigidam in acutis datam, dum intelligo non posse, nisi in certis circumstantiis, tuto exhiberi, dumque novi neutiquam usurpari pro medicamento ab iisdem, qui talia exempla veterum proferunt, & ne in incipiente quidem febre ardente ex solo nimio sanguinis æstu, & rarefactione, multi sustinent frigidam ingerere, quia, si non juvat, nocere potest, & quia nullus certus est, an non faciat obstructions, dum interim certus est eas, si jam adsint, se aucturum. Nolim tamen usque adeo rigidum esse medicum, ut flagitanti acute decumbenti modicum aquæ neget, sed videat circiter saltem, quantum inter se distent frigoris gradus aquæ propinandæ, & caloris gradus hominis ægrotantis; hæc enim magis temperari, æger paululum ore volvere, dein deglutire poterit. Tunc utique non adeo medicamenti loco, quam ut identidem ægrotantis desiderio indulgeat medicus, concedit frigidulam. Ac si quis etiam sanissimus, mul-
tum



tum æstuat, sanguisque valde rarefactus, & agitatus est, ut sit a vehementioribus exercitiis, aut ab ira, hunc æstum, & motum feliciter compescit frigida, dummodo prius ore aliquamdiu contineatur, atque parvis, & repetitis haustibus deglutiatur, ne frigoris nimio sensu aliqua pars, aut totum corpus afficiatur. Neglectis autem his cautelis, maxima mala oriuntur, quod omnibus notum esse debet; & non modo ea phænomena observantur, quæ paulo superius retuli agens de effectu frigida in corpus acute decumbentis; sed & raucedines sæpe incurabiles, nec raro cum integra loquelæ ablatione, pleuritides, peripneumoniæ, febres acutæ pene omnis generis, polypi in venis majoribus, & in corde oriuntur: quarum omnium rerum exempla nimis frequentia suppeditant imprimis milites, cum ex itinere exhausti, æstuantisque affatim subito rivorum obviorum latices bibunt, similiter chorearum amatores, dum imprudenter haustu frigida sanguinis æstum compescere student.

Et si hæc morborum genera non superveniant, hydrops aut pectoris, aut abdominis excipit frequenter admodum haustum frigida plenior æstuante corpore. Tota enim retinetur in corpore, quamdiu suo frigore agit: sed brevi post intepescit, ipsasque fibras, quæ ante spasmodice contractæ fuerant, nimium relaxat, & quasi macerat; minus ergo vasis coër-



coërcita effluit in cavitates corporis, & quidem majori copia, quam quæ per venas re-
forbeatur intra datum tempus. Attamen ma-
xima causa ea esse videtur, quod non omnes,
quæ per frigus factæ fuerunt obstructions,
referantur; unde obstructis arteriis in aliqui-
bus locis major per apertas fit impetus, ma-
jor quoque humorum copia derivatur in mino-
ra vascula lateralia illa, quæ ad superficies in-
ternas corporis exhalant, & hoc tanto ve-
rius apparet, quod, si post haustam frigidam
corpus valide exerceatur, ut sudor moveatur,
aut urina, raro hydrops superveniat: etiamsi
non superessent aliæ obstructions internæ, nisi
referantur vasa cutanea, & renalia, aut deri-
vatio fiat ad fistulam intestinalem, oriri hy-
drops debet, si multum ingeratur aquæ, seu
frigidæ, seu calidæ.

Quum igitur totius rei cardo maxime ver-
setur in eo, ut aquæ frigus sit accommodatum
ad calorem corporis, non modo frigida, hoc
respectu dicenda, poterit in febribus conti-
nuis, biliosis, aliisque putridis propinari; sed
pariter in innumerabilibus aliis casibus. Etenim
cavendum est tantum, ne sensu acutiori fri-
goris, vel totum inhorrescat corpus, vel qua-
rundam partium vasa constringantur, ut fau-
cium, œsophagi, bronchiorum, pulmonum,
ventriculi &c. Sic in variolis confluentibus
hodie feliciter aquæ potus conceditur, & qui-
dem

dem maxime, quando variolæ sunt in suppuratione, & postea usque ad finem morbi.

Verum ne cuiquam hoc videatur peculiare, nam ipsa aqua hæret in primis viis, donec intepefcat, cumque resorpta affunditur sanguini, jam habet calorem corporis, & tunc non ut frigida, sed ut calida agit per arterias diffusa. Adeoque potest in multis casibus dari bono cum eventu; sed credo tamen, quod longe minus bona sit, quam decoctum aliquod eodem frigoris gradu præditum, & simul viribus medicatis imbutum. Inter illas circumstantias, quæ prohibent usum medicamentorum frigidorum, seu aquæ, seu decocti, potissime recenseri debet asperitas, ariditasque faucium, œsophagi, aut inflammatio earundem partium, ut & pulmonum, pleuræ, ventriculi, intestinorum, & ubi ab aliis partibus ad intestina revellendi sunt humores: siquidem ad pulmones, & pleuram cito propagatur effectus frigoris; reliquis autem partibus immediate frigus applicatur, quo constrictio, & robur majus conciliatur: tametsi enim talia temperatissima esse possint, respectu corporis tamen frigida adhuc esse debent, alioquin non amplius ut frigida considerata essent.

In hæmoptoë factis debitis venæ sectionibus, ab optimis artis cultoribus frigida laudatur longis, ac tenuibus haustibus, & quasi filatim deglutita, idemque confirmavit nobis

Mag.



Magnif. de HAEN. Magis autem frigida convenit, quando morbus iste a nimia humorum rarefactione, nimioque motu, quam cum ab acrimonia sanguinis oritur. Levi enim illo frigore aquæ ab ore per œsophagum descendens continuato, paulatim toti corpori communicatur refrigerium, sed maxime partibus colli, & pectoris, unde conquiescit tandem ille sanguinis æstus, vasculaque contrahuntur.

Qui vero perpendit, frigidam edere vires roborantes in primis viis, & simul mucum diluentes, atque considerat, quid facere possit copia humoris in tubo intestinali constanter agitati, is concipiet facile, quare nuper admodum *Cel. van den Bosch* viderit expulsione vermium adjuvari, dum illico post datum purgans magna copia frigida ingereretur; & quare *Cl. Nicol. Rosen* eadem felici cum effectu fuerit usus adversus tæniam; quare demum frigida nausæ frequenter medeatur: nec non ignorabit, quemadmodum factum fuerit, ut *Cel. Hoffmannus* (a) feliciter opposuerit frigidam Austriacorum, Moravorumque colicis sanguineis, aut quare sæpius eandem in Ileo adhibuerit. At utcunque res sit, & quamvis *Hoffmannus* ipse locupletissimus author narret, maxima tamen circumspectione opus est, nec frigidam ullus hodie cordatus medicus in ileo propinat, nisi quandoque in illo casu,

(a) *Med. rat. Tom. 4. p. 2.*

casu, ubi, sicut dici solet, anceps potius, quam nullum remedium tentandum est. Hæc enim non est primaria, vel Ileï vel colicæ sanguineæ cura; deinde a frigida affatim hausta in ileo metuendus est vehementior spasmus, & hujus sequelæ; in colica sanguinea inflammatio, & multa alia mala inde oriunda metienda sunt.

Simul atque agitur de aquæ communis usu externo; statim occurrit illud, eam usurpari posse diversis modis, quorum maxime recepti sunt: applicatio, ope linteorum, balneum, aspersio, affusio, embrocatio, enema, submersio. Usus externus in multis casibus certior est, quam internus: quia facilius dignoscitur, quod oculis patet, quam quod absconditum intus latet. Vires autem habet easdem externe applicata, ac interne ingesta, nempe roborantes adstringentesque, & si subito applicetur, aut corpus multum incaluerit, etiam horrore omnia in corpore contrahuntur. Embrocatio etiam adhuc alio modo agit, de qua postea sermo erit.

Animo linqentes, & syncopticos advitam revocat aspersa frigida; utique subito illo frigore cum aliqua vi applicata vasa constricta versus cor movent humores, quibus id de novo irritatur. Nec vero dissimile est spiritum nerveum quoque moveri. Cumque vulnus aliquod sanguinem fundit ex vasis non magnis,
lina-



linamentum aqua frigida madidum, eidem appressum compescit fluxum. Næc inutiliter eodem modo regioni pubis applicatur in Uteri hæmorrhagiis. Tamen sæpius in hæmorrhagiis tam internis, quam externis valentior est aspersio facta subito non opinante homine, & hoc rursus valentior est affusio plenior. Nam & proprio frigore adstringit quidem; sed maxime juvat, quod corpus, tanquam ab incusso terrore totum contrahatur, humoresque repellantur in majora vasa: ita terrefactos ob hanc causam, illico totos pallere notum est: Quocunque loco fiat aspersio, aut affusio, poterit effectus expectari, major autem, si fiat loco proximo illi, qui sanguinem fundit. Igitur cum erit hæmorrhagia narium, potius capiti, & potissimum faciei affundetur: Si uteri, regioni pubis applicabitur: si aliarum partium, quam proxime fieri potest.

Suadet CELsus, ut largo canali caput subjiciat, qui per æstatem id habet infirmum: si lippitudines assiduæ, gravedines, destillationesque sint, & tonsillæ male habent, non modo caput frigida perfundendum, sed os quoque colluendum jubet, magisque cum gravius cœlum austri reddiderunt: quod hæc mala quasi consuetudinaria fiunt illis partibus diu relaxatis. Nec sæpe quidquam melius est in cephalalgia, quam diligenter caput frigida perfundere, aut idem linteis frigida madidis



cingere. Crudelis enim dolor surgit a nimia vasculorum distractione; repulsis humoribus, ea liberantur.

Rursus, si quæ pars alia debilior facta sit, five tumeat, five non tumeat, eam applicata frigida confirmat. Si excarnationes sint ab acrimonia foecum, lotique velut in infantibus neglectis, aut a sudore, & affricu partium quarundam, vestiumque, velut in itineratoribus accidere solet æstivo tempore, frigida lotio frequens mitigat fervorem, dolo-remque inde natum, & partes firmat. Ad- versus incipientes inflammationes, quæ fiunt ex debilitate vasculorum, quod quidem in diversis locis evenit, sed maxime in oculis, nihil commodius est, quam ut hæ partes fre- quenter, & diu frigida laventur, aut eadem illis applicata sæpe renovetur. Quin hac me- thodo multæ jam inveteratæ ophtalmiæ dissi- pantur, nimixque humiditates oculorum re- primuntur. Propterea HIPPOCRATES (a) non tantum ad incipientes tales inflammatio- nes frigidam laudavit, sed ea quoque usus est in juvene tetanoideo carnosî habitus, licet alibi dicat, frigidum esse nervis inimicum, & si mordax est, tetanos creare. Neque val- de raro proderit in Colica flatulenta: con- densat enim aerem nimis expansum, & intesti-
nis

(a) Sect. V. aph. 21.



nis robur addit. Verum tamen ex his, quibus per morbum eam applicare liceret, multi sunt, quibus propter alia corporis vitia non licet; maximeque illi, qui debili pectore sunt, male afficiuntur; jamque monuit HIPPOCRATES eadem Sectione, aquam frigidam pectori esse inimicam, tusses enim inde moveri, sanguinis eruptiones, & catarrhos induci.

Ad rachitidem inter Anglos nonnunquam balnea frigida bono cum effectu recipiuntur. Ad invasionem rheumaticam, dolorem ischiaticum ex debilitate ortum, ad debilitatem, lassitudinemque ex nimia seminis jactura eadem balnea plurimum extollit *Cl. TISSOT*. Sed tamen sine judicio, & cautela his uti non convenit. Nam si fiat totius corporis subita immersio, idem cum horrore totum corpus refrigeratur, ex quo pessima mala oriri possunt, imprimis in infantibus: adeo verum est id, quod ab optimis etiam authoribus semel, aut bis observatum est, non posse pro regula accipi. Cum igitur talis medendi ratio videbitur convenire, satius erit lente in balneum descendere, aut primam aquam calida temperare, deinde frigidam paulatim affundere.

Non desunt, inquit Illustr. Van SWIETEN (a) observationes numerosæ, quæ docent plurimis etiam incassum adhibitis balneis calidis, curatas fuisse paralyses per frigida

(a) comment. §. 1069.

gida balnea. Id vero dicit, posteaquam explicuit, hujus curam tentari per calida balnea, frictiones &c: neque enim hujus morbi prima cura est balneum frigidum: si tamen, adhibeatur observandæ sunt cautelæ, quas mox proposui.

Russi ex hypocausto sudantes, toti rubri & pene fumantes sese præcipites in proximum dant rivum, si propter glaciem id fieri nequit, caput, reliquumque corpus largiter perfundunt. Id ferre potest ruffus, non idem germanus. Hoc modo homines cito fiunt robustissimi, & pariter cito senes. Incredibile enim est, quantum addatur corpori robur, quantumque solida, ac fluida densentur; non tantum sicut ferrum candens, quod aqua subito extinctum duratur in Chalybem.

His ita propositis intelligitur facile jam quousque sequentia vera esse queant. Nempe refert HOFMANNUS (a) a se frigidam abdomini applicatam profuisse in gravissimis colicis, alvum, quæ nullis aliis medicamentis obediebat (b) fuisse reseratam, dum bis intra minutum femoribus cruribusque affunderetur frigida. Periculosum Ileum hac ratione curatum *Magnif.* DE HAEN in Nosocomio practico retulit. Ab EUDEMIO *Themisonis* discipulo enemata frigida in passione cardiaca,

(a) med. rat. T. 4. p. 56.

(b) medical. essais T. V. pars 2. p. 893.



& leipothymia fuisse adhibita, jam COELIUS AURELIANUS notavit. Sed ut hæc, & similia vera sint, nec illustrium virorum auctoritatem violare velim, proprietates aquæ frigidæ tamen animo tenendas, neque quod grandis ausus aliquando produxit, protinus tanquam præceptum artis habendum existimo; siquidem talia periculosa sunt, & non satis rationi congrua, nullis dixit oportere medicos sine ratione temerarios esse. Atque frigida sæpius nocebit in doloribus colicis, si ab acrimonia, vel simili causa nati, & cum inflammatione conjuncti sint; prodesse poterit interdum, cum erit colica flatulenta. Quod femoribus, & cruribus affusa referaverit alvum, id quidem sine periculo esse potest, sed istud inter rarissime contingentia reponi debet. In ileo periculoso metuendum, ne periculum augeatur, nec eam itaquæ adhibere vellem, nisi cum alia remedia fuerint incassum adhibita.

De epilepticis, quos affusione copiosa frigidæ restitui vidit CL. SOUVAGES (a) & de submersione maniacorum, atque hydrophoborum dicere possumus, quod olim CELSUS: *aliquando, quos ratio non restituit, temeritas adjuvat.* Non est in omnibus eadem epilepsiæ causa, neque est omnibus eadem corporis conditio, ideoque credo, id, si frequenter tentaretur, posse juvare paucos, noce-

(a) Acad. de Scienc. 1739.



nocere multis, & potissime, quia multo sæpius ignoratur causa materialis. Cum HELMONTIUS testetur omnes, quos submergi vidit maniacos, liberatos fuisse, nisi præcociter ex aqua educti fuissent, non negat SWIETEN, submersionem locum habere posse, sed tantum, quando res ad extremum pervenit, sic enim ait: *videtur ergo adhiberi posse tale remedium in desperata mania, cum absolutum vitæ periculum non adsit.* Maniaci præcipitantur in aquas profundas, & submersi tenentur, ut idea in sensorio communi fixa hærens deleatur, pariterque præcipitantur ii, qui ab animali rabido morfi fuerunt, ut ab hydrophobia præserventur, & si jam hydrophobi facti sint, præcipitantur tamen, ut aquæ metus abigatur. Tenentur sub aquis miseri, donec mortui appareant, & nulla vitæ signa supersint, (a) quidam apud Batavos statuunt spatium temporis, quo recitatur Psalmus *Miserere* integer, adeoque circiter per duo minuta, istud utique spatium satis incertum est, nec determinari potest, quoniam alii citius extinguere possunt. Mirum autem non est, hac methodo curari maniacos, nam pro momento delentur omnes ideæ, hinc, & illa, cui inhærebant; mutatur ergo sensorium commune. Minime vero patet, quâ vi rabiosum venenum mutetur, aut extinguatur, aut destruat, quan-

(a) Swieten in §. 1123.



do demorsus submergitur: metus summus incutitur, fiunt labores, & angustiae summæ sub aquis, dum suffocatur circulatio Sanguinis, & cor, pulmonesque obruuntur, præterea nihil scimus. Notandum, quod istud curandi genus olim sæpius fuerit adhibitum; nunc vero rarius, & apud nos rarissime, vel potius nunquam vocetur in usum. Nec ipse *Illust. SWIETEN*, qui diligentissime refert observata diversorum, memorat se maniacum ullum, aut contagio rabioso infectum in aquas præcipitasse, aut consilium dedisse. At ubi jam adest hydrophobia, & maxime cum morbus incipit tantum, serio suadet longam submersionem, non ad suffocationis periculum usque, sed ut modo deprimatur immersus, modo attollatur, sicut meminit *CELSUS*; simersio locum non habet, copiosam perfusionem fieri jubet: quia hoc modo sæpe tollitur aquæ metus ille horrificus, & miseri tunc bibere possunt, & medicamenta assumere. Neque timendi sunt effectus communes aquæ taliter adhibitæ, satius enim est, in extremo morbo hominem extrema experiri, quam adeo calamitosa morte perire.

Jam superest, ut de Embroche nonnulla dicam.

Embroche, vel embrocatio dicitur ea methodus, ubi liquida ex alto in partem quandam corporis affectam, vel stillicidio, vel

crassiori filo depluunt. Methodus hæc venerandis videtur antecessoribus jam nota fuisse. GALENUS (a) enim jam dicit: *quod si humidum sit, quod applicandum erit, si ex alto effundas, ac veluti fontis ritu penitus intro ac ictu magis compellitur.* Si jam confideramus liquorem ex alto guttatim repetito ictu in partem vivam arietare, aut crassiori flumine torrentis instar majori impulsu in illam agere, non miramur, alios, eosque meliores in quibusdam morbis inde sequi effectus, quam si idem hoc liquidum solo fotu applicatum fuisset. Sola ergo actio, & vis cadentis aquæ magnam in parte affecta inducit mutationem. Præter motum humorum enim, quem in parte auget, & calorem, quem ibi excitat, etiam impetus a cadente aqua solidis, & fluidis ibi hærentibus communicatus plurimum confert; rubor enim, tumor, & calor id docere videntur. Impetus autem delabentis aquæ motum, & concussus satis fortes parti conciliat, sicque stagnantia movet, obstructa referat, lenta dissipat, & sæpe pulcherrime prodest.

Licet embrocatio diversa liquida in varium scopum medicum, vel medicata, vel alia petat, & pro materia assumantur, loquor hic solummodo de aqua, quæ vel sola, aut medicata recipitur.



Si effectus ratiocinio respondent, non est, cur de hujus remedii præstantia dubitemus. Magnus enim morborum catalogus sanatorum, & fidelis observatio gravissimorum virorum nobis testimonium exhibet. *Illust. L. B. van SWIETEN* (a) locum solum adduco, qui de præstantia embrochæ agens loquitur in illo casu, ubi cura paralyfis acres requirit stimulos, motum majorem in parte, **thermas** decidentes admodum profuisse asserit: dicens: *quia partem affectam movent, & satis fortiter concutiunt.*

Eodem in capite de paralyfi *idem* confirmat ex FLOYERO, & imprimis si *Cataractæ ex alto labentis aquæ supponatur pars affecta.* Intelligit hic aquam frigidam, siquidem paulo ante de balneo frigidus agebat.

Somni ex embrocha secuti, & sic feliciter curatæ maniae exemplum ex FLOYERO refert *idem Illustr.* dum nempe ex viginti pedum altitudine frigidissima aqua irruebat in caput maniaci, unde Secutus somnus fuit profundus viginti novem horarum, & postea evigilans æger sana fruebatur mente.

In multis adhuc aliis topicis malis præsens subinde Embroche auxilium affert aliis medicis incassum tentatis. *Stupenda magnif. DE HAEN* in suis prælectionibus practicis, dum agebat de auditus læsione, de effectu em-
bro-

(a) T. III. §. 1069.

brochæ retulit. Non omnem scilicet spem esse abjiciendam in illa surditatis specie, ubi nulla inflammatio, nihil vitii in usu sex rerum non naturalium commissum fuit, spem adhuc superesse recuperandi auditum per usum Embrochæ: In testimonium attulit thermas aquis-granenses, ubi furdi ita ponuntur, ut aqua in illud latus, in quo surditas erat, stillatim delaberetur, obturato vero prius ope gossypii meatu auditorio; facit hæc aqua ex altissimo decidens, dum irruit undequaque in circuitum auris, ut os petrosum concutiatur, tremorque excitetur in toto osse petroso, & partibus vicinis, sicque per iteratas embrocationes desperati quoque sanabantur. Præter has aquas etiam Selteranam aquam, aut cui facultates non admitterent, simplicem aquam, in qua sal Tachenianus solutus est, in eundem usum commendavit.

Tumores albos embrocatione aquæ frigidae intra paucas septimanas curatos retulit idem Magnus.

Multi adhuc essent casus, in quibus hæc embrocha inexpectatos effectus producere posset, ubi videlicet materia morbi in parte crassitie peccat, & solida in hanc agentia, vel languent, aut pene inertia sunt, ut sunt obstructions sine inflammatione, anchyloses variæ, diversique tumores, & depositiones a relaxatione partium, & alia plura.



Aqua gelida, & glacialis, & nivalis longe majore frigoris gradu pollet, ideoque longe majores effectus edit applicata corpori animali, multo potentius adstringit solidas partes, & fluidas condensat, multo majore horrore corpus concutitur, & applicata copiosior corpori, humores omnes illico repellit in majora vasa, atque calorem naturalem simul extinguit. Hinc longe gravius nocere potest, quam frigida simpliciter aqua dicta. In multis tamen casibus potest adhiberi summo cum ægrotantium emolumento, sed prudentia opus est.

Magni nominis Chyrurgi, inter quos HEISTERUS, ad prolapsus, & hernias applicuere gelidam, imo ipsam glaciem bono cum effectū, dum alii calidorum emollientium usu nihil effecerunt. In prolapsu ani &c. ope linteorum, aut spongiarum applicari potest, sed lente, & adhuc inflammatio abesse debet. Herniosum locum utique roborat, & tamen in hernia incarcerata poterit aliquando usum habere, cum ea scilicet recens sit, sine inflammatione, aut certe sine magna, cum aere distendente intestinum prolapsum, & impediēte repositionem ejus; tunc enim & humores, qui incipiebant congeri circa locum herniosum, repelluntur, aër intestini condensatur, & in minus volumen redigitur, ac ipsum intestinum fortiter contrahitur, & quidem admodum cito,
quæ

quæ cum facta sunt, admodum facile reponitur quandoque, aut solo corporis situ; aut adjuvante simul manu. His vero diu insistere non licet. Nam si non juvat, dum aliquoties fuit aqua renovata, vix juvabit, intereaque locus herniosus paulatim magis adstringi poterit. Cum facta est repositio, ad roborandas partes nimis debiles, & relaxatas valebit.

Ad reprimendum feminis fluxum ex abusu veneris natum, non sine læto effectû genitalibus admovetur. Phymosim etiam curat, si nulla, aut levis tantum inflammatio adest, & si non ab ingenti acrimonia ibidem deposita, nata est. Quantum valeat ad partes congelatas a gangræna, & sphacelo præservandas, docet *Illust. van SWIETEN* (a) quod congelatum est, sive sit totum corpus, sive pars quædam, id nive multo obtegatur, dein aqua frigidissima diligenter applicatur, aut etiam balneo frigidissimo immergitur; sic paulatim ad temperiem aquæ reducitur, & tum in ejus tota superficie prodeunt spicula glacialia, quæ aqua extrahit. Si totum corpus, aut magna pars ejus ita fuerit affecta, ultimum est, postquam prodire spicula, ut homo repositus, tectusque in lecto cardiacis refocilletur. Ubi congelata pars protinus calore fovetur, priusquam educta glacies fuerit

(a) S. 424. & seq.



rit per aquam gelidam, brevi postea supervenit gangræna, & sphacelus immedicabilis, quod non est rarum, siquidem vulgo solent hominem tali modo affectum, & instar statuæ rigentem in hypocaustum transportare. Sic narravit *magnif. de* HAEN puerum olim Viennæ utrumque pedem sphacelo corruptum amisisse.

Possent adhuc multa commemorari de viribus aquæ gelidæ, sed ut ipsa ex proprietatibus aquæ hujus communibus omnia fluunt, ita minime necessarius est sermo proluxior.

Quando de calida dicere aggredior, non intelligo fervidam, quæ corpori applicata, illud comburit, & partium nexus dissolvendo gangrænam producit, sed hanc propono, quæ parum excedit calorem naturalem sani hominis: quæ interne, & externe adhibetur. De quibus multa dicere non est opus, cum ista per omnem studiorum cursum clare, & copiose tractentur; ea tantummodo conabor in compendii formam redigere.

Omnis aquæ calidæ virtus considerari debet ut emolliens, laxans, solvens, diluens, penetrans, & attenuans, demulcens, & acrimonias eluens.

In aqua calida emolliuntur partes animalium durissimæ, molles etiam confertim intumescunt, & chordæ ea madefactæ fiunt una sexta parte longiores, quod non perinde facit



facit frigida, atque dum aquæ calidæ vapores alluunt corpori superficiem, prolicitur sudor copiosissimus: ex quibus intelligitur vis *emolliens*, *relaxans*, *penetransque*.

Diluit autem, dum interpositione suarum particularum fluidius reddit, quod aut crassius, aut spissius erat. *Attenuat*, dum eadem interpositione particulas dividit in minores. *Solvit* quando dissolvit, ac dividit corpora alia, & sic sibi adunat, ut cum illis unum, idemque homogeneous fluidum constituere videatur. *Demulcet* partes solidas irritatas eas emolliendo, & relaxando; *demulcet* fluidas partes, aut alia heterogenea corpora dividendo, attenuando, diluendo, & mutando figuram, molemque eorum. *Eluit* acrimonias, suppeditando vehiculum, quo tanquam majori torrente, & majori urinæ secretionē abripiuntur.

Denique ipsa eadem est vehiculum sanguinis, & eorum, quæ vel nomine cibi, aut medicamenti ingeruntur. Quamdiu in humoribus nostris adest aquæ copia sufficiens, tamdiu libere fluunt per omnia vasa, si modo vasa bona sint. Si deficiat aqua, oriuntur obstructions, & secretiones, excretionesque turbantur, aut impediuntur: si hæc reddatur, ipsæ denuo restituantur. Adduntur acria sæpe, ut fiat actuosior, urgeaturque fortius per vasa minima, & aperiat magis. Aut admiscen-

tur



tur quoque non raro talia, quæ lentiores eam, ac mucilaginosam efficiunt, ne tam cito elabatur de corpore, & diutius applicata hærens, efficacius relaxet fibras, & inviscet acrimonias notabilius.

Valet igitur tepida, vel sola vel cum aliis coindicatis, non solum in cunctis morbis inflammatoriis, ardentibusque, sed in omnibus etiam, in quibus peccat motus circulatorius cum sanguinis densitate, & fibrarum rigiditate; fitis ob impeditas secretiones, vasorumque minorum obstructiones, siccitas oris, faucium, totiusque corporis peripheriæ ob eandem immeabilitatem humorum, calor, dolorve a tensione nimia fibrarum; dolor ventriculi, & intestinorum ex causa acri in his locis hærente natus; denique si urina vel propter rigiditatem vasculorum renalium, spasmusve ab acri excitatum parcior fluat, aut ipsa acrimonia vesicam, urethramque irritet &c.

Quod autem ore ingesta præstat, idem efficit ano injecta, ut inde prorsus pateat pulcherrimus usus enematum talium in quam plurimis morbis, tum ad eluendas fæces, & acrimonias intestinorum crassorum, tum ut resorbeatur venulis bibulis, & sanguini copiosa admisceatur, maxime si, postquam elutæ fuerint fæces, enemata talia parva, sed frequentia, & sine sale sint, tunc enim non irritatis intestinis tota resorbetur.

Sed



Sed ex iisdem clare quoque patet, quantum juvare debeat usu externo forma balnei, pediluvii semicupii, fomenti &c. Etenim fordes cutis abluunt, cutim emollit laxatque, aperit poros cutaneos, ut inde corpus disponatur ad diaphoresim, pariterque intra corpus penetrat, & aut jam partium, quibus applicatur, immediate rigiditatem tollit, aut per venas cordi tradita per totum corpus diffunditur, humoresque diluit, & solida relaxat: hinc optimi authores usum externum calidæ quam plurimum laudaverunt: Iamque balneum *Alexander TRALLIANUS* ad diathesin melancholicam, *BOERHAAVIUS* ad uteri scirrhusam diathesin, & ad menses, qui propter rigiditatem uteri subsistunt, aut parcius & cum dolore, spasmusque prodeunt, commendavit. Neque quid melius reperiri potest in spasmis ab irritatione natis, in nephritide præsertim calculosa, in colica nephritica, imo in colica pictonum, in doloribus ex calculo per ureteres descendente, in hærnâ incarcerata; in dysuria, stranguria, ischuria, in morbis cutaneis maxime, quia & crustæ scabiosæ emollitæ decidunt, & emollita tota cute, materies illa copiosius exhalat, & quod intus adhuc acre hæret, id magis diluitur, ac mitigatur; neque quidquam melius est in ligamentorum rigiditate, & in morbis arthriticis. Ipse vero *BACCO VERULAMIUS* tam salutarem




rem balneorum usum existimavit, ut in iis recte adhibitis summum sanitatis, & prolongandæ vitæ adminiculum posuerit: cujus iudicii rationem intelligit, quisquis perpendit, hoc modo retardari rigiditatem senilem, vascula conservari pervia, & humores quadantenus renovari; atque adeo mirum est plane nos, qui veterum exempla verbis ubique celebramus, ab ipsis iisdem veteribus deficere, & in re tam salutari, tamque facili negligentes esse.

Quod si in morbis fiat, ut usus balneorum esse nequeat, saltem fomenta ex aqua calida possunt recipi, quæ notabile levamen afferunt in doloribus, & rigiditatibus topicis, inflammatoriis, imo in febribus illis acutis, in quibus & densitas humorum, & siccitas solidorum adest, omniaque fere exuruntur, admirabiliter profunt ea fomenta locis, ubi pori magis patent, applicata, quin sæpius convenit crustas variolosas, ut citius decidant, aut pustulas ipsas pure turgentes, ut citius rumpanantur, ne pus acre circumrodat, fovere multum aqua calida.


Semicupia, & pediluvia ob vires rursus aquæ calidæ communes, potentia sunt, tum in morbis multis superius recensitis, sed in iis potissime, ubi revellendi sunt humores a superioribus, & deorsum derivandi, imprimis autem in morbis acutis cum delirio, tum in aliis mor-

morbis capitis a raptu sursum sanguine natis, aut ab inflammatione membranarum cerebri, ut in comate, phrenitide, cephalalgia, cephalæa, vertigine, apoplexia, ophthalmia, dein in anginis, otalgiisque; tum ut pauciores variolæ prorumpant in facie, palpebris, faucibusque feliciter aliquoties per diem adhibentur pediluvia, & maluvia.

Jam etsi aqua calida quocunque modo applicata valde efficax reperiatur; tamen in vaporem resoluta longe magis penetrat, & emollit; his enim vaporibus expositum cornu cervi ficcissimum, ac durissimum longe citius emollitur, ut brevi flexile totum fiat; nec vero quidquam artis medicæ Coryphæi BOERHAAVIUS, & SWIETEN melius noverunt, ad emendandam rigiditatem articulorum, atque scirrhus emolliendos, discutiendosque. Nihil potentius, nihilque commodius movet sudores, quam aquæ calidæ vapor, dum is corpus linteis, & præsertim ceratis bene tectum alluit. Hoc vapore efficacior vini spiritus credebatur, donec rei falsitatem publice nobis demonstraverit *Magn. de* HAEN, quod enim ex accenso spiritu corpus alluit, ipsius aqua est, quæ collecta non in flammam ardet, sed eam extinguit, & si spiritus ipse corpus contingeret, non adeo illud relaxaret, ut potius roboraret.



Idem vapor ore, naribusque hautus tussim ficcā, ac molestissimā lenit, in diversis quidem casibus, sed tamen optatissimus est in tussi sicca, quæ comitatur inflammationem pulmonum, in qua vias aëreas emolliendo humectat, coctionem accelerat, & sputa promovet; præsertim etiam vomicam disponit ad rupturam, ut tanto citius expediatur circulatio per pulmones. Similiter cum resolvi tumor inflammatorius in cynanche, & synanche non amplius potest, aquæ calentis vapor accelerat suppurationem, & abscessus rupturam; catarrhum, & coryzam maturat, gravedinem solvit; ad genitalia fæminarum directus lochia revocat, augetque, menses provocat, harumque partium dolores a spasms natos sedat: hæmorrhoides inflammatas interdum ita, ut ne canula quidem introduci queat, lenit pulcherrime; tum BOERHAAVIUS ad podagram provocandam, aut evocandam, & materiam rheumaticam profunde musculis impactam, evocandam deprehendit utilem admodum.



Hydrotherapy



